



**Nunatsinni innarluutilinnik sullissisuusut ilinniagaqarnissamut  
piginnaangorsarnissamullu pisariaqartitaat aallaavigalugit Naalakkersuisut iliuusissamik  
suliassamullu piareersaasiamik innarluutilinnik sullissinermi piginnaangorsarnissamut  
pisariaqartitat tamakkiisumik pigilernissaannut tikkuussisunik UPA 2015-mut  
saqqummiusseqqullugit peqquneqarnissaannik Inatsisartut aalajangiiffigisassaattut  
siunnersuut.**

(Inatsisartunut ilaasortaq Ruth Heilmann, Siumut)

(Siullermeenera)

Demokraatini ilinniartitaaneq pingaartittuaannarparput tamaattumik una Ruth Heilmannip siunnersuutaa assut nuannarutigaarput. Siunnersuummi kissaatigineqarpoq iliuusissanut pilersaarusiortoqassasoq innarluutilinnik sullissinermi ilinniarsimasunik sulisussaaleqineq aningorniarlugu.

Qularnangitsumik sulisut nuannaarnerulersussaapput innarluutilinnik sullissinermi piginnaasaqarnerulersinnaagunik. Tamatta nalunngilarput ukiorpassuarni sualummik perorsaasut amingaataasimasut. Aamma ukiorpassuarni kissaatigineqartarnikuuvoq sulisut taakku atungaasa pitsaanerulernissaat. Demokraatini kissaatigaarput perorsaasut allallu innarluutilinnik sullissisut sulinermini atugaat pitsangorsarneqassasut, pilersaarusiornermut akuutinneqassasut aamma iliuusissanut pilersaarusiornermut kiisalu akissarsiaat taamatullu timikkut tarnikkullu sulinermini avatangiisit pitsangorsarneqassasut.

Massakkut ikorfartortit inuusuttunik inersimasunilluunniit annertuumik innarluutilinnik sullissisut piginnaangorsarnissaminnut periarfissaqareerput tamannalu perorsaasunngorniat ilinniarsianni ingerlanneqartarpoq. Kisianni soorunami piginnaangorsarnissamut periarfissat amerlanerusut takorusuppagut, sulisunut ilinniarsimasunut ilinniagaqarsimanngitsunullu.



Siunnersuuteqartutulli nuannaarutigaarput, Naalakkersuisut, 2012-mi ukiakkut ataatsimiinnermi Naalakkersuisut immikkoortup 101-p suliarineqarnerani ilisimatitsissutigimmassuk, pilersaarutigalguu innarluutillit atugaat pitsanngorsarniarlugit pilersaarusiornissaq taamatullu iliuusissanut pilersaarusiornissaq. Qilanaarpugut pilersaarusiortoqarnissaanut iliuusissanullu pilersaarusiortoqarnissaanut aamma soorunami neriuppugut Naalakkersuisut tamanna siunnersuut suliaminnut ilanngukkumaaraat.

Taamatut oqaaseqarluta Demokraatini siunnersuut Inatsisartut Ilaqutariinnermut Peqqissutsimullu Ataatsimiititaliaanut innersuupparput.